

安

楚

錄

安楚錄卷五

文移

欽差巡撫湖廣地方兼贊理軍務都察院右副都御史秦 爲開條約以撫地方事切照當職猥以庸虛叨承

簡命畀以拊循重寄且屬荆楚巨區蒞任以來夙夜惕厲顧惟地方廣闊政務浩繁諸司玩愒百事因循倉庫日見空虛錢糧歲多侵負盜賊竊發於江湖苗夷動擾於邊徼詞訟蝟集而刑獄不清工役繁興而科需不止足

國裕民誠難爲力除奸革弊敢不究心所有合行事宜擬合播告通行爲此除外合行出給告示

張樹曉諭撫屬官吏軍民人等一體遵奉施行  
須至告示者 其目凡三十條詳載撫湖政要

今節審編均徭一條于左

一審編均徭之法前巡撫處之詳矣但其間論  
糧者有詭寄論丁者有隱射論家道者里書  
高下其手奸弊頗多未爲盡美况近來優免  
之家太濫小民不蒙實惠爲今之計必須委  
官得人先將三等戶則審定方與一例斟酌  
均編除正德十年編過者不必紛更外合以  
正德十一年爲始預於隔年八月以前通行  
審編停當曉諭人戶遵行但州縣地方廣遠  
守巡官未能遍歷其管糧管屯兵備撫民等

官俱堪分委姑候本院將各官酌量分定地方另擬審編事宜申明優免事例開款責付各官親詣該管州縣逐一查照施行如慮一時難遍許各選委府州縣的當官員分理其事審編畢日造冊呈報

計開

用在得人大抵任法誠不如任人審差尤貴有心計原委二司官皆的當但勢難於遍歷亦恐不能速完仰各訪察所屬好官委用如知州賢能就審本州知縣賢能就審本縣不必更調若果無官可用方許別委如附郭就

委知府外處選委賢能府佐分投審  
編二司官仍先將分管州縣上年審  
過均徭文冊火速弔取到道逐一檢  
閱比並較量如其處人戶丁糧本多  
且在僻靜而差反輕相應量增其處  
人戶丁糧本少且居繁要而差反重  
相應量減其處差雖輕而路衝民貧  
相應照舊其處差雖重而地僻民富  
不宜減少通融損益不失原額將上  
年文冊親筆改動明白行文責付承  
委官員遵照審編正德十一年均徭  
若果利便永爲定規二司委官先將

分委過府州縣官員職名作急開報  
本院查考

精審戶則大抵戶則高下關係最爲緊  
要均徭之審編里甲之科派解戶之  
點僉飢貧之賑濟據此查行舛繆者  
鮮承委官員務要先立限期出給告  
示今日審某里至某里明日審某里  
至某里官定期以審民刻期而至畫  
地爲九略倣井田却令九則人戶各  
居其一冊弔三樣細查人集該年研  
審某戶人丁若干田糧若干家道若  
何堪爲上上某戶人丁若干田糧若

千家道若何堪爲上中某戶人丁若干田糧若干家道若何堪爲上下其餘中下二等六則倣此間如某戶丁糧雖多而家道蕭條止堪爲中某戶丁糧頗少而貲財豐盛實堪居上不憑里書一面之詞必采前後衆人之論某也比前增盛則由上中而降爲上上某也比前消乏則由上中而降爲上下某戶寄莊丁糧若干疇零何人帶管某里逃移田糧何人種納亦各定與戶則某也疾故則除某也隱漏則收某告減擦一則就令舉該陞

而未陞者以補之方准減擦某告開  
除一丁就令舉該報而未報者以代  
之方准開除每里每甲每門每丁互  
相比方就令攀扯務使戶之高下稱  
其力之厚薄中間陞減戶則開除人  
丁俱要官親填註完畢印封收置固  
密所在却令善書人役謄寫造成審  
冊對同鈐縫不許付之吏書以啓改  
換之弊

定編均徭大抵審差之法貴在均平丁  
糧家道必須兼論承委官員務要用  
心將繁州縣舊派或新改差徭通共



計算若干內該力差若干約計工食銀若干銀差若干實該用銀若干如將原審戶則草冊逐一揭查槩州縣人丁若干田糧若干九則人戶若干除例該優免并逃亡人丁及下下極貧無糧人戶不派外餘如上上戶人每丁派銀若干糧每石派銀若干家道另派銀若干以次八則人戶酌量分派通融扣算數穀而止若慮丁多而漏報却將每丁出銀比與糧石數加一倍但力差難易不同亦須隨宜區處如

王府斗級及各驛支應庫子等項繁難重差須  
於上三則人戶內編僉或一名或二  
名應當剩下丁糧却作柴薪齋膳馬  
夫等項派銀其各衙門及城隍山川  
社稷邑厲等廟壇門子與弓兵禁子  
更夫渡夫等役省易輕差却編下三  
則人戶或一名獨當或二三名朋當  
仍須定與近家去處便其應役剩  
下丁糧亦作銀差其餘各則人戶并寄  
莊疇零俱要銀力相兼酌量搭配勿  
令偏累惟逃絕人戶止就於佃田人  
名下論糧編銀審編畢日每戶出給

印信花關票帖一紙內開本戶丁糧  
戶則及編過銀力差數付與各人收  
執該銀差者照票出銀上納該力差  
者照票出力應當仍總書大字榜文  
張掛本衙門首曉諭知悉一面備查  
造青冊存照繳報如或止憑吏書隱  
瞞捏報賣富差貧許被害之人告發  
從重問罪承委官員一體究懲

照例優免大抵免差太濫則利歸大戶  
害及小民流移盜賊皆起于此查得  
布政司原奉戶部勘合內開在外方  
面以下大小官員人等既免人丁又

免田糧不無太濫合無通行各處今後除隨朝文職內官內使戶內丁差俱照舊例優免其餘見任方面官員之家各免人丁十丁知府免八丁同知以下至知縣各免人丁三丁八品以下至雜職省祭聽選等官及舉人監生生員吏典之家俱一例各免二丁著爲定例今據各屬繳到正德十年文冊違例優免頗多貧民豈勝若累相應申明禁約仰各審差官員務要查照前項事例止免丁差不許徇情冒濫准其糧免其京官之家如有

遠族親友暗將田地私自詭寄戶內  
隱蔽差徭者查訪得出一體究問審  
與銀差如殷實之家有違例一戶充  
吏三四名者亦就論其家道量編銀  
差不必逐名免丁遂其脫避之計其  
攢造戶則并均徭冊內就開該免人  
戶若干人丁若干某係見任某官某  
係見役吏典某係舉人監生生員俱  
要明白填註于各戶之下以便查驗  
派里甲銀兩大抵里甲之設十年輪當  
一次如催徵錢糧勾攝公務出辦軍  
需物料皆係正役京官大臣及貧難

丁戶亦不得免今後各州縣派徵里  
甲銀兩就將今次審過戶則文冊逐  
一揭查俱以丁糧多寡家道厚薄爲  
準均派出銀庶革奸弊人心稍平如  
藥材段疋軍器麋皮胖襖天鵝冬筭  
等項額辦料價及春秋祭祀迎春鄉  
飲酒禮孤老布花曆日紙價等項該  
於當年里甲內派納若黃白蠟葉茶  
芽茶銀珠二珠烏梅明礬百藥煎五  
倍子紫草土茜草黃丹金箔桐油錫  
黑鉛生漆紅熟銅黃熟銅生水牛皮  
牛筋鹿角水牛皮白真黃牛皮白

硝麕皮虎皮簪竹笙竹黑紫竹笙竹  
長節苗竹白長節苗竹長節苦竹篾  
小竹織金大紅紵絲青素紵絲白素  
銀絲紗大紅素線羅青羅深桃紅素  
平羅綾紗紙劄蓮肉柿餅麥米篔簹  
蜂蜜乾魚紅棗栗子核桃薑黃皂角  
肥阜鐵線黑煤魚綠膠生血黃牛皮  
紅真黃牛皮黑真黃牛皮櫨木軟竹  
篾竹掃帚小楠木連二板枋楠木連  
三板枋楠木單料枋杉木連二板枋  
杉木單料枋拖梢杉木平頭杉木李  
其木等項及各

王府婚喪祭祀房墳等價與夫歲貢盤纏舉人進士坊牌之類不係額辦之數須候布政司派到方於該年里甲內照驗丁糧分派不許每里槩徵及遞年預派紊煩里甲至於各項顏料解戶并行取水手等項亦據審冊內編僉如某項僉解戶一名或二名約計扛解若干水手一名或二名約計工食若干卽照丁糧家道各依年分挨次輪僉起解應用

已上條件該載不盡各官別有革弊便民良法聽自斟酌從宜施行



事有干礙及更張太甚者呈來定奪本道務將各委官審過戶則并均徭案草冊逐一查驗盡善無弊方准騰發施行

酌處補遺仰布按二司卽便轉行各道守巡管糧清軍撫民兵備管屯等官各委廉能府州縣官將各該州縣該年里老并應審甲圖人戶拘集到官弔查原審定戶則冊內丁糧家道三等九則再加面審除下下無糧極貧人戶免派外奸豪大戶漏報人丁一一審出各項濫設差役酌量裁減以

甦民困中間如有民情土俗不同亦聽通融處置如營建并鄉飲祭祀等銀相應於均徭內編派者就行改正不許靠損該年里甲各儒學齋膳夫照柴薪阜隸每名一十二兩閏月加一兩毋令過多務要斟酌戶則高下編派差徭重輕若家道銀兩既於戶則內加增不許任意另派其一年之內有將田地典賣者許訴出得業之人照數認當其各官員下應得柴薪馬夫齋夫等銀共計算該若干就於本州縣混編均派總收分送不許僉

定某人在於某官下致生逼勒多取之弊若本處數有不穀方許於附近州縣贖編人戶除例應優免外其厨校民壯亦俱免二丁若重則官糧比與輕則民糧亦要減去分數定編如先次編定戶則官未用心精審今次委官就行覆實改正務俾苦樂適均毋得偏累靠損致民嗟怨大抵銀力二差數盡而止不許違例多派餘銀以滋奸弊審編畢日各出備細印信票帖給與人戶執照應出力者照帖出力應出銀者照票出銀仍出大字

榜文張掛諭衆通知

送繳文冊前項戶則審冊及均徭青冊  
就仰該州縣備細開造用印鈐記每  
冊一樣三本一本本州本縣一本本  
府一本差人齎送本院閱過就發布  
政司收架各備照其餘衙門並不許  
濫送多費紙張工食以後有事就於  
司府州縣弔查其二司委官止將戶  
則均徭二項攢造略節總數文冊各  
一本呈繳本院查考

欽差巡撫湖廣地方兼釐理軍務都察院右副都御  
史秦 爲計處驛傳以便官民事正德十三年

八月二十五日准兵部咨該本部題車駕清吏司案呈奉本部送兵科抄出該本院題前事據湖廣按察司管理屯田倉糧兼管水利帶管驛傳副使汪賜呈繳覆議過推官朱節等計處過驛傳事宜揭帖到臣據此卷照先准兵部咨爲審編驛傳事內開每十年通行天下撫按衙門轉行布按二司守巡官及各府州廉幹官員親歷所屬督同州縣各掌印官弔取原編各驛遞夫役文冊到官查照諸司職掌定例及節年奏准見行事例從公逐一查審磨勘重編丁糧相應者作正消乏者作貼應僉替者即與僉替務使賦役均平驛傳修舉自文書到日爲始限六箇月

以裏編完各布政司并直隸府州備將編審過緣由通類造冊奏繳施行仍造青冊一本送部查考等因題奉

欽依備咨前來已經通行布按二司轉行各道守巡分投委官審編未報續准兵部咨爲祛宿弊以圖治安事該雲南道試監察御史甯欽奏前事內一件改幫戶以均民力乞要行查衡州府所屬各州縣丁糧各該若干各縣馬紅站船各該若干每年小修各該用銀若干每年十年大修各該用銀若干隨其該用銀兩多寡將各縣丁糧分派每成丁一丁田糧一石量徵三釐五釐或一分二分定立成規但遇該大小修年分俱申

撫按衙門定奪轉行分巡分守查照原定數目  
行該府州縣責令糧里隨糧徵收解府貯庫應  
解部者解部應給發者給發委官修造仍將徵  
收解給修造過銀兩船隻數目繳報撫按守巡  
查考其前項馬紅等船夫役止自備工食及過  
關米銀撐駕船隻并行南京兵部但遇馬船修  
造年分行委該衛掌印官領各府解納原價銀  
修造各船夫役不許干預以革該司該衛扣減  
官價之弊各縣幫戶盡行改正無則通融分派  
幫贖等因素行到部前件查得各處驛遞馬驢  
牛夫等項舊例俱就彼處各照土俗排定丁糧  
每十年一次編會今御史甯欽奏稱前因歷舉

時弊深切民隱是亦興利除害之意相應查處  
合無本部備咨巡撫都御史秦再行查勘所  
奏前項事情因時裁損痛加禁革務要合於人  
情宜於土俗官民兩便徑自依擬施行等因到  
臣又經通行委官查審及節催造報間隨該臣  
征進郴桂撫臨衡州催據該府將審編過驛傳  
文冊送看及詢訪民情土俗多稱未便又經發  
委黃州府推官朱節會同武昌府知府沈暎查  
審計處及令帶管驛傳副使汪賜覆議去後今  
據繳到臣照得湖廣地方接連七省驛遞之設  
最爲繁難先年舊規大小船隻每三年一小船  
五年一大船十年一成造鋪陳五年馬匹三年



各一買補其水馬夫役皆係洪武年間免軍永  
充之數後有消耗逃絕却將丁糧相應人戶僉  
領凡一應修造買補之費俱於原驛傳冊內朋  
糧正貼人戶驗糧徵給近年以來法久弊生在  
驛廛則有往來勢要凌辱勒取之害在民間則  
有包富夫頭勾擾科歛之繁及至十年審編官  
不經意吏緣為奸如馬驛繁難則改充水站本  
係殷實則捏作逃亡弊害多端難以枚舉為今  
之計欲革驛傳之弊在絕科歛之源在行雇募  
之令大抵各驛遞夫役除原係先年免軍額充  
見在者難以更動其餘糧僉者若復坐定姓名  
不無仍舊科索亦非穩便欲令臨期旋徵又恐

緩不及事且重併累民惟是槩將各州縣田糧  
通融審派銀兩雇募夫役應當船隻鋪陳依限  
置造庶幾有補所據御史甯欽先次建言及今  
推官朱節副使汪賜等所議臣又從宜變通參  
酌損益似爲衆輕易舉官民兩便臣隨通行布  
按二司并帶管驛傳副使汪賜查照先今案驗  
內事理卽行武漢安沔一十八府州著落各掌  
印官一面將近日造報驛傳文冊逐一檢閱除  
南京江濟二衛朋糧水夫近日編過者不必更  
動彼中合用工食什物等項移咨南京兵部議  
處至日另行外其本省驛遞水馬夫役且令照  
冊應當正德十三年一年不許推避一面轉行

選定委官各將發到條件逐一遵照查審要見  
各該州縣原額水馬夫若干其驛遞該馬紅站  
船各若干上中下等馬匹各若干草料工食該  
銀各若干鋪陳什物該銀各若干每船每馬通  
計該銀若干以十年通算十分爲率每年量徵  
一分該銀若干就查審該州縣原額秋糧各若  
干除例該優免官員并軍匠等戶量免若干其  
餘通算每糧一石該銀若干比照江浙蘇松原  
僉北方馬頭事例於派糧由帖內附寫帶徵各  
州縣掌印官當堂秤收類解本府驗發貯庫每  
年俱限十二月以裏完報違限者掌印管糧官  
照例住俸提問各委官一面就於驛遞附近居

民選募稍有產業行止之人編爲夫役籍其年  
貌在官造成文冊一樣五本府州縣各存一本  
巡撫并帶管驛傳衙門各送一本備照截自正  
德十四年正月初一日爲始其夫照名給銀應  
當如有事故者計工扣算銀兩在官隨缺隨募  
仍將各船額充糧多者作爲夫頭管船其餘并  
雇募俱作散夫若免軍夫役內有情願出銀雇  
募代當者亦聽其便仍存本名庶不紊亂版籍  
仍照舊例十年一次審編如永充額僉夫役內  
有逃絕者務要查究的實亦作雇募之數不許  
聽信里書受財捏報如違事發連坐以罪其應  
該修造買補并過關等項悉照開去條件施行

各府州仍備云出給大字榜文給發所屬州縣  
驛遞衙門常川懸掛廳堂諭衆知悉緣前項事  
宜先該兵部咨行查勘御史審欽所奏事情因  
時裁損痛加禁革務令合於人情宜於土俗官  
民兩便徑自依擬施行臣雖通融計處周悉備  
行審編以爲經久之圖但恐地廣驛多人心不  
一將來不行遵守又至紛更煩擾如蒙伏望  
皇上軫念湖廣地方衝要驛遞十分困累乞

敕該部查照再加參酌如果臣議相應就便依擬施  
行著爲定例永爲遵守地方官民不勝幸甚緣  
係計處驛傳以便官民及准兵部咨爲審編驛  
傳并祛宿弊以圖治安事理未敢擅便爲此今

將計處過驛傳事宜開坐具本正德十三年六月二十七日題奉

聖旨兵部知道欽此欽遵抄出送司案呈到部看得巡撫都御史秦 奏要比照江浙蘇松原僉北方馬頭事例將湖廣所屬各驛遍夫役除原係先年免軍額充見在者難以更動其餘糧僉者隨糧帶徵銀兩雇夫應役著為定例永遠遵守并開議清夫役定規則均出辦嚴稽考四事皆議處精詳關防周密事已施行難以別議但立法雖善行之在人先年巡撫河南都御史徐恪照蘇松事例將河南驛傳夫銀隨糧帶徵雇募應當其後糧銀歲有逋欠兼以災免不能周給

所雇夫役率多逃亡旋議復舊今都御史秦

奏內開稱每年限十二月終徵完違限者掌印  
管糧官住俸提問本官亦已預知有此弊矣合  
無本部移咨都御史秦 督同布政司官再將  
驛傳夫役每年合用銀兩通算見數却將各該  
州縣田糧計算每年該徵銀兩若干務使一歲  
所入足穀一歲所出之用稍存贏餘以備不虞  
仍將驛傳銀兩前項徵收不在蠲免之例其所  
收銀兩雇夫買馬置買鋪陳事干驛傳者動支  
外其修理公廨等項不許那用其餘事宜悉依  
都御史秦 所議施行正德十三年七月初八  
日少傅兼太子太傅本部尚書王 等開坐具

題本月十一日奉

聖旨是欽此欽遵合咨前去煩照本部題奉

欽依內事理欽遵施行等因准此擬合就行爲此除  
通行外誠恐所屬文移浩繁難於檢閱及照續  
有議處事宜亦合併行開示仰武昌府刊刻書  
本申送本院以憑發屬遵奉施行須至簿冊者  
計開

一曰

清夫役

二曰

定規則

三曰



均出辦

四曰

嚴稽考

其文并冊式及續議事宜詳載驛傳  
事宜刊本

告文

正德十二年丁丑十月十有七日巳未

欽差巡撫湖廣地方兼贊理軍務都察院右副都御

史秦 謹具牲醴庶羞告于

南嶽衡山之神曰惟神靈峙鴻龐秀鍾荆楚位視  
三公祀享千古祐我

國家運祚靈長雨暘時若物阜民康蠶爾奉徯胡

爾跳梁殘我黎庶犯我天常罪惡貫盈神人共憤三省合兵威武斯奮某承

上命討茲不庭建旄設旆戎醜攸行兵過名山禮宜告祀尚冀神休默相成事殄除兇豎肅清邊隅班師振旅厥功赫如謹告

正德十三年戊寅二月二十有四日癸巳

欽差巡撫湖廣地方兼贊理軍務都察院右副都御史秦 謹以牲醴庶品遣按察司副使惲巍祭于

南嶽衡山之神曰惟神峯崇祝融職奠南土區薄海嶺暨神之振南疆弗靖予請討之維功有成神實相之其雲其雨其霰其雪時物釀康南醜

用蹶春陽遲遲我旅其來俯蹈仰瞻濡陰旣開  
橐籥憐舒弗僭弗違謂匪嶽神司此化機有憲  
臣巍實予臂指刳牲縮茅克代子事嶽神戾止  
曰歆予誠殛兇佑良南土永平南土之平予任  
神職

主德明明報祀無斁

安楚錄卷五

安楚錄卷六

敘碑文

總運戎機序

長沙易舒誥

翰林院檢討

正德丙子柳桂徭人嘗犯境巡撫副都御史秦公方議請討適有事於貴州用與人之言止踰年丁丑春正月徭復擁衆四劫破栗源破安仁破攸縣勢甚熾湖湘之間騷然震動時公在岳聞告急遂趨衡督兵捕之賊聞公至乃遂解去公因留衡月餘鎮撫其地議

請必討諸屬吏進曰徭據險驕悍難破反啓釁不如撫而順之公乃怒曰徭惡至此尚置不問無國

法矣有復言勿計者叱之議乃定乃疏於

上請合江西廣東三省兵夾攻之

上乃命公同太監杜甫董師命總兵楊英統之命巡按御史王度紀功同謀和衷俱爲一體至期楊道卒公曰今兵糧俱集若復待

請將則我師老而賊且遁非策也遂握兵以往十月次於長沙進次於郴州以叅將史春代楊統師以右布政使方璘督餉以副使惲巍督贊以副使陳璧爲前監軍以僉事顧英爲後監軍以叅議黃質爲左監軍以僉事王濟爲右監軍以知府何詔計宗道推官王瑞之朱節協贊而公居中以制之某者爲千夫長某者爲百夫長某者

騎某者步某者于某者戈某者矛某者金某者  
鼓某者爲先鋒某者爲後應某者探某者邏咸  
旣分列乃颺聲曰爾將士來聽予告汝徭惡貫  
盈我

朝廷憫茲下民爰舉大衆爾其體

上德意曰

朝廷養汝用在今日汝其宣力用命有厚賞不用  
命有顯戮曰臨陣有進無退曰無妄殺曰坐作  
進退其如律曰爾衆士其知孝弟忠信親上死  
長之道不知此者吾弗用也曰壁其自桂東進  
於東水軍焉凡樟溪延壽以東汝其擊之曰英  
其自臨武進於芭籬軍焉凡牛頭天堂以南以

東汝其擊之曰質其自桂陽進於魚黃熱水軍  
焉凡朱廣以東以北汝其擊之曰濟其自郴州  
進於紫溪軍焉凡九峯遑落以東汝其擊之曰  
巍春其軍於兩路口相機而動曰某處賊衆地  
廣宜用兵幾何曰某處賊寡地小宜用兵幾何  
曰某處宜騎其用騎兵曰某處宜步其用步兵  
曰某可以計取曰某可以勇勝諸將士既聽指  
授各就於軍令至則發地形險易賊虜情狀或  
騎或步或計或勇或用兵多與少舉如所示不  
差毫末右軍與賊數十戰破三十餘崗斬俘甚  
衆獲其大首四左軍破三十餘寨斬俘甚衆獲  
其大首二斫破牛革裹柵後軍破二十餘崗斬

俘甚衆獲其大首二前軍破寨斬獲功如後軍  
十二月報至公乃曰有龔福全者渠魁也今未  
獲可以論功乎乃懸重賞且令於軍中曰此虜  
不獲爾輩無還期越五日而繫龔福全之頸致  
之幕下矣公曰未也此一時之利耳乃除其地  
爲郡邑衛所移兵以實之使餘孽勿復潛於其  
間仍命有司曰民財已困飢旋其無設饗於是  
璘魏羅等約曰吾與若等得効微勞皆出我公  
神謀廟算其謀所以昭示遠邇乃繪圖貌公以  
在師羅賢命將選士出令之象而書

朝廷命征獎功敕詞其上而屬舒誥序之夫諸寮  
佐皆一時豪傑而公皆羅而用之聽公左右如



子弟之從於師保而今又爲之圖非有能服其  
心而能若是哉兵固難言也近世之號爲儒者  
多短之豈儒固不通於將邪公博通經史善著  
文詞方弱冠已名動江左李西涯一見稱爲江  
南才子楊邃菴稱爲當代名臣人間其言遂以  
公爲文士爲雍容端重坐鎮雅俗而不知精於  
兵事雖將門弗逮昔爲河南叅政以孤軍却勁  
賊楊虎以全封丘封丘人爲立生祠今又平貴  
州之苗平榔桂之徭而兩省之人咸賴之夫無  
所不通之謂儒公其所謂儒者非邪三代時伐  
淮夷召穆公將之征玁狁尹吉甫將之討荆蠻  
方叔將之此非儒者邪後又有張良鄧禹馮異

魯肅杜預婁師德輩皆號爲儒將然鄧馮以下  
或雜於孫吳權詐之術而大韜之義微矣今公  
之師出以正無事詭譎褻狎之知其召虎吉甫  
方叔之徒歟時朝議將大拜公公行且釋兵革  
之事論道調元於廟堂之上勳德其宏遠矣公  
名金字國聲別號鳳山常州無錫人其世行履  
歷人共知之不列焉

平南偉績序

蘆泉劉績

鎮江府知府

湖廣連年水災決堤頽城封疆邑落盡爲魚鱉  
據洲居者棲木杪以待援陸處者采鳧苽以爲  
食積尸牛馬羊豕器物日蔽江下倉廩在空

虛時不可爲也。柳桂地當五嶺交，蜿蜒磅礴連  
亘江廣，竒峯斗絕，屬繹周道，自成關隘。路若羊  
腸，登均魚貫。前者攀緣進後者首躅，其踵徭賊  
柵居山巔，斷木弗殊，懸石比列。俟過者推歷，斬  
繩雖千百人，皆仆壑成壑。東自龍泉萬安大庾  
南自保昌曲江仁化樂昌乳源西自連州連山  
寧遠藍山臨武北自桂陽常寧大肆剽掠來如  
飄風去如急電，賊不易克也。曩歲戊辰奉

命征者不敢擣穴，孟浪報捷，遂蔓延莫支。越九年丁  
丑大中丞秦公鳳山巡撫駐長沙聞破安仁攸  
縣寅夜馳湘潭拯命守備李璋屯興寧之新溝  
扼其歸路賊還伏起擒魁首龐廣等獻公留三

月撫摩傷殘會三堂議合三省兵夾攻及借南  
畿糧銀支司庫鹽價爲軍需

上命允是歲仲秋秉鉞南征總兵道卒上下疑恐公  
曰彼地秋有黃芽瘴春有青草瘴撲人辣鼻眩  
首不起惟冬可進兵若俟請帥則失時且成

命已頒可中止乎遂毅然自任不寢不食思險隱情  
以虞仁而通者使督徵廉而密者使主餉謀而  
斷者使贊畫勇而剛者使當矢石懼革盾不利  
也編巨竹爲之勁弩矢爲中虛挾墜木石爲筠  
滑溜古今名將所不知也分土漢軍爲四哨命  
曰勿殺良民勿掠財物犯有常刑服者不禽格  
者不赦犇命者不獲悉依榜旗招撫若折首有

重賞雖獷悍如土兵亦皆用命不三月獲元惡  
盡楚諸寨四望翳木叅天恐潛伏令搜邏相繼  
書名於樹果獲自綏於柯者捷奏陞俸廕子是  
役也去枝官省浮費謀資人斷用已殄殲殆盡  
財用尚餘不可爲而能爲至難克而易克視韓  
范當豐亨之時建功不侔矣方伯文玉方公與  
贊襄述而求予銘予於二公舊寮深知爲之銘

曰

柳桂之間萬山連屬猺賊據險跳梁躑躅守臣  
失馭戕官屠城暨暨秦公儒服提兵羽扇一揮  
川流火燁如燎鴻毛如漂朽葉左文右武拯溺  
亭屯冠紐耳見闌臺烝泯疆理經營厥功濯濯

我欲磨崖勒銘衡嶽

平南偉績詩後序

張邦奇

湖廣提學副使

南者何，柳桂之夷也。衡於五嶽爲南，柳桂在衡南，又數百里，其地於湖藩亦南也。何以平夷弗靖也？夷性狼貪，豕蹠出沒，叵測。邇者勢日益熾，肆患我赤子，赤子徂亡，籲天俟救於朝夕，蓋若是其急也。且我

國家土宇版章，薄海內外罔不臣順。柳桂雖南，然際以幅幘於今日襟咽地也。奈何愛方寸白刃，使襟咽梗塞乎？是其勢不容以不平也。孰平之？都憲鳳山秦公也。公撫巡湖湘，是役也，實合江

廣二省之兵而皆主於公是故平南之績皆歸焉稱績何夷紐於網踈之日久矣曾不自量劫燒我廬舍毀越我城郭妄稱大號煽黨長奔而將繹騷我天下勤兵而夷之固不可不謂之績矣然奚偉乎是績先嘗有攻之者頓兵數月漫以捷聞曾未歲時而跳梁如故公之舉是也蓋將爲數十百年計矣且今湖湘非曩時比也征科雜需之餘歲游大水而公私之耗已極方建議也僉曰時詘甚矣奈何乎舉羸公曰赤子焚溺誰能袖手戰旣剋期總戎楊公卒於道人咸危焉曰必請將公曰是坐失機也督戰如期蓋若是其斷也量險易度便宜計財賦借京儲廣

鹽利經營矻矻罔間宵晝蓋若是其勞也比舉  
事也不絲髮干民而大侵之歲如屢豐而用之  
有贏調兵裒糧千里之外如股掌間而運量必  
中漫數百里嶮巖幽阻叅錯之地如平原小圃  
冝而蒐之負固桀鶩之徒歷世以爲患僅再匝  
月而殄滅之無遺育蓋若是其神也君子謂是  
役也前古之所未聞故曰偉且公文事武功歷  
著齊梁之墟比在湖湘一舉於南嘉而渠魁授  
首散其黨而給之牛再舉於辰沅滌香爐之峯  
而剗其腹靖嘉其上先聲後實罔不赫焉而以  
底績柳桂其神奇卓偉矣疑也詩也者頌成功  
也詠其實可以述揚其善可以勸詩之用也孰



爲之湖之大夫士與仕於湖藩若臬者也仕者  
與其事而居焉者樂其成則皆不容以無言矣  
孰輯之方伯方君文玉憲副憚君功甫也君在  
公帷幄贊畫居多而知公之出謀發慮尤悉以  
爲是不可以無紀也昔者趙充國平羌夷人曰  
必遜其功充國曰何爲必陳吾功使可爲後人  
法也恤小嫌而湮大計非忠臣之所存也君子  
以爲善況視充國有艱且大焉者而可以默默  
也乎敘者敘所以作詩之意也是績也劉君用  
熙敘之旣前乎諸詩矣復屬予後何古者獻功  
在泮泮予職之所司也而宣猷赫遠非予其誰  
宜抑公之意亦欲以文事終古之道也

禱雨有感志喜詩序

餘姚陳雍

工部右侍郎

予自少業禮晚年又取詩讀之至大雅雲漢之篇有曰靡神不舉靡愛斯牲又曰耗斁下土寧丁我躬此周宣王丁歲旱而禱祠于神寔遇菽而懼之意也因憶禮檀弓篇記魯穆公遇旱欲暴尅巫而縣子以爲不可復欲徙市而縣子可之蓋旱而欲徙市者自責以喪君之禮所以可爲也夫古之於旱也內則責諸已外則求諸神宣王有周中興之令主固無容議矣穆公無足取者惟是徙市之舉爲庶幾焉正德庚辰夏六月不雨四郊龜坼苗已就槁楚民憂懼倉皇無

所於告巡撫中丞鳳山秦公懋然曰此吾之責也乃檄有司誅日沐浴齋戒徧禮諸神以禱之檄之詞則曰政事有乖歟刑獄未平歟民隱未宣歟官若吏奸貪酷虐歟有一于此皆足以致旱尚其深省而痛革之噫是卽厲宜遇哉而懼魯穆遇旱而自責之意也時予督木于岳中丞東湖吳公撫夷于辰有司以公檄轉致之予亦焚香齋潔而默禱之吳公率屬致禱處越翌日辰岳皆雨又翌日武昌諸郡皆報得雨在在霑足歲其有秋楚民舉欣欣然有喜色而相告曰此吾秦公之雨公曰天雨也吾禱而應者偶爾然亦喜民之喜乃作近體詩二首以志之羣有

司及楚

宗室大夫皆翕然和之公又嘗以志喜原倡示子  
與吳公子與吳公亦皆和之憲副張君世祥裝  
潢成冊送予登寫訖適公過予因覩是冊公初  
未之知也作而曰詩則美矣盛矣不有公言以  
弁其端可乎予應之曰諾嗚呼公之雨于楚也  
亦久矣夫公之蒞楚也賦者均訟者理病者瘳  
什者起顛連無告者咸得其所嘗潦水非常者  
連二歲民弗堪命公極力拯救之復請于

朝命吳公乞鄰帑來賑恤之民獲更生又徃寇擾  
郴桂諸州苗賊叛貴陽宬邇偏鎮公皆請兵東  
西並擊之楚賴以寧去歲江右逆藩于紀楚寔

上游衆皆洶洶公獨凝然不動惟遣方面一二  
人率鄉兵以守邊復稍稍調土兵以選振之卒  
保無虞又值

王師親征戎馬紛紜芻糧供億之費不貲公亦區畫  
有方民無所擾然則茲雨之澤民也豈不旣優  
旣渥且霑且足乎哉公曰此吾所嘗致力者予  
又曰公之雨茲土也近六年矣

當宁之物色于公者亦非一日矣行將召而致之

廟堂之上寄之以阿衡之任如傳說之大旱作甘  
霖則公之雨天下而霑膏澤于斯民也又非特  
楚一隅而已公笑曰若此則吾豈敢然斯言已  
盡之矣請書以爲序於是乎書

平南碑

莆田林俊右都御史

國家汛掃胡元還帝王之中國  
穉被冠裳櫓巢襲我  
盛宇航浮索引之國  
簾負以歸職貢維南  
徃牙互湖江廣之間  
姓名湔在民版乘間  
竊發三邊懼其害今

天子方嚴內修舉外攘北平劉趙西平監曹南平胡  
徐及王黎獠之在東者平無虛歲徭以爲略已  
也寇郴桂仁化上猶數十縣俱震于是有平南  
之師授都御史其柄詔陳公金主之贛王公守  
仁主之衡則鳳山秦公金陳元老壯猶二公則  
文武爲憲者也時方鎮香鑪山之苗之征公擇

能授計而自解郴桂之急偕鎮守杜公甫巡按  
王君度謀同以其兵屬參將春統之三司守巡  
分之魏贊之責餽餉鳳璘而覈其功實於度璋  
濟由郴進廷爵質由桂陽進宗仁英由臨武進  
翰壁進自桂東公馭中賁戰丁丑十一月至于  
閏月連破其寨峒若柵九十而疇擒其僞大王  
龔福全斬其僞總兵劉福興李斌若首若從與  
屬而俘者凡三千而餘焚賊屋千區牛馬器仗  
無數二公韶贛之功稱是征苗師亦成告捷聞  
上置書褒獎加公俸錄一子爲錦衣百戶邊人悅喜  
願立石紀功德古者治夷宜略斯近土之夷出  
入爲梗易之師田有禽利執者也而決勝靡遺

是謂丈人之吉采芑美方叔以見周宣中興之  
功平南碑不可已繫之詩曰

粵在禹服甸侯要荒綏處文武華夷之防維時  
山徑入我障塞鴟義矯虔作我蝨賊王者無外  
合是以容來柔來訓息其諄兇維昔有苗言格  
于羽徐方其來亦戒師旅維徃罔念卒玩以狂  
爨 罔輔縣翼虎斯張

帝念邊人懼茲慘毒雨熒熒寃鬼夜哭咨爾臺臣  
其摠朕師錫之弓矢玉書銀符公時征苗擇可  
以莅選將練兵物焉弓器有赫申令宿戒其鄰  
如雷如霆三方以征何神天至寇是大窘魂飛  
計窮縮如蛭蟻外示猶圖厥孽弗雄戮其魁酋



活其耗童會應機投策無遺算匪臣之能蔡功  
之斷言釋其俘以訓以勅胡不藝樹偕我衣食  
胡不賢販偕我經營胡不絃誦偕我太平維時  
南荆文物上國胡襲曠頑以赤其族維

帝之威亦天之怒遏其亂源章我王度南荒既平八  
方肅清歷服無疆

天皇聖明

安楚錄卷六

安楚錄卷七

詩詞

應城陳金

少保兼太子太保左都衛史

鐵冠光照柳營軍，玉斧稜稜靖楚氛。  
允濟信由威克，愛功成端賴武兼。  
文祿增臺憲昭，殊寵恩到兒

孫獎大勳不盡，聖明崇報意丹書。  
還見出紅雲

霜威秋凜氣，豪雄生殺都歸掌握中。  
謀到山頭兇類滅，計來心上惡巢空。  
干戈分眼看黎庶，日月騰光照老癯。  
我亦驅兵承帝命，慙無寸策贊元功。

連雲劔戟旅如林，熊虎桓桓勇氣森。  
鼓吹喧聲遮道去，都臺仗節督兵臨。  
伯平政善民懷惠，叔寶功多帝賚金。  
夷醜寒心疆場靜，軍中韓范古猶今。

文相新持武將權  
貔貅親督事安邊  
全收奸宄歸三尺  
力挽狂瀾障百川  
要使黎元熙綠野  
肯將忠義負蒼天  
柳陽山上多情樹  
吹播清風不記年

吉水毛伯溫

巡按湖廣監察御史

守臣屢報柳陽急  
天子親分閭外權  
一鼓豺狼空野穴  
萬年牛犢事春田  
瀟湘波靜旌旗動  
衡嶽厓高姓字鐫  
四海卽今多寇盜  
討平全仗濟時賢

長沙羅墜

右副都御史

才望如公世豈多  
李唐裴度漢蕭何  
雪風摧敵資羣策  
春日還師詠凱歌  
南土冥頑無復返  
北方豪傑有誰過  
會看獻捷承天寵  
青史芳名耿不磨

邊城狐鼠肆民災  
兩歲煩公兩度來  
腹內甲兵齊范

略軍中威令竝韓才土田分置全歸伍巢穴摧殘盡  
作灰湘漢自今人樂業寵遷還擬近三台

巴陵柳應辰

右副都御史

南麾節鉞拯蒼生兵過閭閻夜不驚憲令昔如軍令  
肅使星今並福星明犬羊曷敢干 皇怒惟幄先能  
料虜情千古英雄同一志請看裴郭再成名

天戈遙授下雲房小虜胡為不自量馘首盡梟空虎  
穴捷書入奏護龍筐毫當運智偏生彩喜欲舒眉已  
報黃今日平蠻誰作頌操觚莫訝老夫狂

莆田方璘

湖廣右布政使

江廣控五嶺郴桂當其衝山高萬仞望不極山深萬  
疊入不窮徭獠棲其間出沒肆厥兇獸奔豕突苦無

厭邇來民物多恟恟擾我農桑使不得以衣食焚燒  
廬舍野火紅妻孥相携父子哭生離死別何匆匆正  
德丁丑歲都臺來我公聞之憂心感懷怒氣填胸一  
夫不獲在我躬何況赤子塗炭中此賊不滅民不寧  
賊雖恃險我以忠急臨衡潭撫傷殘仍以書疏達  
聖聰臣心有成算成算多全功朝來得請卽行事嗚  
呼許國何其雄

右初建議

調兵經幾月羽檄日夜馳黃龍千萬艘夾江列旌旗  
行行止洞庭主帥忽問醫舍黃駐岳陽衆議方支離  
公命亟鳴鼓進進不可遲兵事尚神速師老非所宜  
號令忌不明賞罰貴不移持此御大衆成敗我任之

郴民正倒懸誰克安其危我亦仗大義不計正與奇  
丈人作其氣貞吉寧復疑人人奮勇力持兵以相隨  
決用兵

露布飛鞚來馬蹄疾如箭烽火報平安喜溢行路面  
於惟鳳山公忠誠帝所眷成此不世功天道剛小  
變計慮本周悉臨事真不眩公明濟仁嚴恩威均貴  
賤財餉節浮費軍行有餘羨探人稱任使水鑑其先  
見嗚呼休哉有口不足善公善更僕數之欲忘勅古  
云文事必武備那更大才小亦徧以是告公紀太常  
何必雲龍蛇鳥話攻戰

右告成功

國家育民物致治邁商周邊夷忽猖獗伊誰獻謀猷

荆湖有明公吉甫以爲倚遙制香爐告先捷親督柵  
挂全功收廟堂都與俞頰釋南顧憂自從高皇  
大征後偉績不見如今優乃加公以祿榮祿光祿爲  
等流再錫嗣以爵貂蟬今喜生堯鰲龍章輝煌照南  
服萬人稱羨久不休公拜稽首謝聖恩身難酬惟  
願我皇崇聖德昇平之樂遍九州臣昔受救敷  
上意永收兵馬投戈矛

右嘉偉績

江夏羅練

楚府典儀

南望旌旗照眼明風雷號令坐中生廟堂今日深  
籌策肝膽平生盡甲兵戰壘煙塵三楚淨瘴鄉花柳  
五溪平關山戎馬歸來候笑拍春光送凱聲

平郴陽雅有序

沔陽童承敘儒學生

正德丁丑秋大中丞錫山秦公之有事於郴陽也三  
越月而捷至其門下小生承敘拜手言曰於戲維  
天子明聖鑑物簡用元老維公精誠體國克夷大姦  
君臣同猷用集于成誠一代之奇勛也夫舉戎醜蹈  
炎荒難必其全勝而服遠夷清異域難必其遽成公  
師完而神速尤古所希者是不可以無述也於是作  
雅曰捷武以揚厥休焉

明明我公有捷其武憬彼郴夷來歸無侮矢此王旅  
以辟裔土

維彼郴陽徼于南邦旣酌而醒鬻狡毀常肆其大慙



彼兇負固竇艱其居有石嶄巖有山崎嶇緩之則驕  
蹙之則逋

赫赫帝怒迺眷南粵誰其正之

迺授公鉞往行予罰郴夷是忽

公拜稽首天子是副既類既禋焉維師旅是勅公拜  
稽首臣曷敢弗肅

公醜攸行濟于沅湘旌旄斯揚烝徒皇皇有萬其航  
維水湯湯公服斯煌葱珩有鶴

我公蒞止陳于南郊騷囊且閑中車孔膠虎士如虓  
聿脩厥予不娛以教郴人則咆

郴夷維喙來享來王式訛爾狂南土允荒維郴之民  
于理于疆維郴之士于焉倘祥

邠陽告成維義之正無煩于兵自昔周公荆舒是平  
顯允方叔征伐蠻荆曰公與京

明明我公經營四域昔在中夏矢其文德耆定膚公  
作屏王國於皇遐哉文武維則

公之歸兮嗟挽其衣兮山平川兮厥巧巍巍兮 帝  
錫公主錦衣孔輝兮 天子聖神四方來威兮於萬  
斯年維公功是依兮

右捷武十有一章五章章六句五章  
章八句一章章十句

金陵沈景 楚府左長史

報國據忠歷有年才堪任重握兵權一揮白羽綬三  
省六出奇謀計萬全赫赫功應書汗簡堂堂像合繪

凌煙鳳山屹立高千仞撐拄江南半壁天

貴陽董嘉謨

嘉魚縣學訓導

泰山磐石天下重名望如公世所稀  
數萬貔貅遵號令滿腔韜略握兵機  
天香錦軸泥封誥彩色春羅御賜衣  
補袞還期歸大手蒼生翹望翊龍飛

賀平蠻獻捷詩二首

西蜀田定

編草熟學教諭

韓范胸中百萬兵壯猶先已震蠻荆  
龍泉揮處光寒斗虎穴探餘草帶腥  
盡角曉來風吹冷油幢午夜月華明  
凱旋師旅歌春日始信書生舊有名

天威赫赫殄羣苗命將專符下九霄  
文武兩全歌吉甫英雄千古數嫖姚  
運籌決勝風霆迅講藝陳常

日月昭竹帛于今新 國史袞衣回首相 清朝

讀平南生祠二碑

華容王儼 戶部左侍郎

舊時方岳此中臺河北荆南兩禦災八陣風雷清宿  
霧七旬干羽滅氛埃呂侯祠宇宜生創裴相碑銘可  
後裁最是報功 恩獨厚凌煙畫閣正崔嵬

餘姚陳雍 工部右侍郎

平南靖獯寇也巡撫鳳山秦公身斯役而偉績為莫  
加焉

平南有策伊誰籌之維我鳳山寔首謀之

平南有役伊誰主之維我鳳山寔身以之

蠢爾有獯維犬維羊蹂踐我疆場肆 天兵一臨勿

遺爾猖狂

蠢爾有猥維蛇維虺荼毒我民庶肆 天兵一臨勿

遺爾噍類

南旣平矣厥績偉矣歸以告 明天子天子曰休哉  
加豐汝廩餼世蔭汝後嗣以報汝勞勤於戲 君義  
臣忠蓋於斯爲至矣

右平南五章二章章四句二章章五

句一章章九句

東湖吳廷舉

右副都御史

峒徃干紀合專征都憲親承 帝命行筆下縱橫經

世學胸中多少屈人兵電矛霜鏃森相向虎帳羔裘

坐不驚一鼓掃清三省難馬前喝彩羨書生

傳穴干  
幽侵犯

湖南衡桂江右  
南贛是三省也

豫章周季鳳

湖廣左布政使

桂嶺風煙幾千丈  
儒冠汛掃一尋常  
旄倪載道呼天降  
山藪逢人慶日長  
捷奏總知心更赤  
恩深何但紙惟黃  
穹碑未盡當年事  
看取青編耀八荒

姑蘇盧雍

監察御史

儒服雍容號令齊  
指麾精銳上巖梯  
火炎萬柵空巢穴  
雪暗千峯罷鼓擊  
捷獻有書歸廟算  
兵銷無用樂耕犁  
蠻煙瘴霧俱清廓  
銅柱新看續舊題

太原張天相

湖廣左叅政

楚地幅員長  
東南控三省  
山路疊萬重  
深箐入幽境  
徭賊巢其間  
金錫之在礦  
乘間肆侵掠  
狼貪兼虎猛

偵報亟追襲茂如奔電影愍茲在邊氓胡爲罹此青  
桓桓都憲公全才素脫穎方切內治修未遑攘外騁  
首建議專征 廟堂俞至請出師夜隕星慷慨任將  
領轉漕餼糧集指揮蕃漢整先事奪人心神速變俄  
頃渠魁旣就擒群黨無作梗頓令氛祲消廓清及五  
嶺捷奏 大明宮 聖心良耿耿功大賞宜隆世恩  
殊非倖况復貴陽役決勝時亦靖 優詔屢褒嘉雲  
龍煥彪炳恭惟經營勞仰仗謀猷併臨敵身代將安  
危衆心警自非應變才汲深以短綆優游有餘地實  
用非畫餅願勒磨崖碑奇勳垂久永

古范黃質

湖廣右叅議

登壇受鉞總戎兵

朝野安危仗老成陣上指揮天

地轉幄中籌策鬼神驚幾年狐兔隨烟滅一統山河  
並日明殊賜貂裘恩萬里麒麟畫閣蚤馳名

長壽聶賢

湖廣按察使

一劔曾提百萬兵洗天風雨掃撓搶南方鎖鑰今司  
契北斗經綸久迓衡士悅詩書敦禮讓農安畝畝樂  
耘耕麒麟高閣雲霄上拭目丹青炳炳明

仁和汪賜

湖廣按察司副使

幾年群獠肆縱橫 救我中丞握重兵六月不毛呼  
噪入三軍戰氣爲誰生匡廬永享熙寧福田野權稱  
公相名從此烽煙當絕跡咨詢再不及干城

平南曲六首

信陽孟洋

湖廣僉事



黃昏烽火動邊疆  
一夜徃兒滿桂陽  
勁弩長槍當虎穴  
垂髻赤腳繞羊腸

中丞仗鉞出湘關  
虎將熊師指顧間  
籌策蚤從帷幄定  
旌旗不待羽書還

江夜虹霓拂劔鋒  
蠻天霜雪淨軍容  
蛟螭遠走三湘水  
瘴癘全消五蓋峯

伐鼓鳴金唱凱歌  
夷方從此息干戈  
且看銅柱高千尺  
不是當年馬伏波

金殿傳呼賜錦袍  
漢庭今喜得蕭曹  
卽知生像開麟閣  
已見恩波浴鳳毛

江草萋萋江水流  
青萍不用買黃牛  
桄榔樹下聞蕉語  
天子今無南顧憂

晉江顧玘 湖廣右叅議

方叔胸中有壯猶提兵三月靖蠻陬凱歌曲按陽春  
奏露布竿搖毒霧收南顧 主憂平地釋北來 恩  
賞自天優從今事業歸廊廟共羨明公正黑頭

開州王綖 湖廣按察司副使

兩階千羽歇分北舊種作怒臂學虎狼清晝恣吞搏  
明廷赫徂征壯猷坐幃幙白刃不染血蠻酋爭面縛  
洞庭彭蠡湖喧動凱旋樂七縱復七擒今失漢諸葛

武陵楊禔 太僕寺卿

霜撒炎荒下紅巾白羽麾控弦試驚鳥當道借孤羆  
瘴嶺雲爲墨春江水泮漸平淮勞後刻望峴寄遐思

崇陽汪必東 戶部郎中

輕投臺省文章筆，遠豎干城號令旗。一掃鼠狐歸洞穴，載揚鷹隼漸雲遙。華夷雨澤煙塵被，荆楚威名草木知。端此平淮功不讓，誰銜金石績韓碑。

耒陽胡文璧

山東按察司副使

捷書夜奏

大明宮喜溢

龍顏寵錫同五嶺，祇象

看欲淨三苗，遺穴掃全空。不消銅柱標殊界，擬拂丹崖紀駿功。南嶽山高湘水碧，中丞威德併無窮。

春暮初旋桂嶺，兵旄倪隊裏，凱歌聲羽千載舞三苗。界蛇鳥空閑八陣營，楚國河山皆雨露。漢家籌畫重良平，誰將文武分途看。一介書生萬里城。

阜城沈冬魁

都御史

得報江西事，平陽明鳳山。夾輔之功真不可，誣宗社

之福斯文之光敢併以爲賀忻忭有作更不計詞之  
拙也錄上用紀歲月

故人千里報書來一瞬南臺到此臺 宗社有靈昭  
庇賦江湖無地着氛埃敢辭軍旅非吾學更許儒生  
是將才回首五雲高處望文光夜夜燭三台

乎徃詩有序

長沙易舒誥翰林院檢討

桂陽之東有徃崗盤據千餘里乃湖廣江西廣東三  
省之邊有高山大谷密林深壑可爲隱伏不服貢賦  
自立帥長在昔時常竊發爲患今正德丁丑春正月  
乃擁衆數千分道四劫勢甚熾其入湖廣攻破諸堡  
燒安仁燒攸縣諸司承平日久兵事不整所過披靡

殘破 欽差巡撫湖廣都察院右副都御史秦公曰  
徃人惡極若不致討何以示遠乃疏於 朝請合湖  
廣江西廣東三省兵夾攻之 皇帝曰可乃 命秦  
公總督湖廣軍事十月公提軍三萬至郴州大監杜  
公同視師巡按監察御史王公紀功督餉則布政司  
右布政使方君監軍則按察司副使惲君董哨則兵  
備副使陳君左叅議黃君僉事顧君王君協贊則衡  
州府知府計君而指揮節制悉惟秦公是聽是從公  
乃卜日進兵所向皆克十二月渠魁授首黨與悉平  
秦公乃曰兵法有之制夷之道殺戮不如防禦今巢  
穴盡空曷若畫地爲郡邑衛所屯兵守備使諸徃自  
今以後不敢西向此萬世之利也將區處併賦以奏

於是計君告諸郴陽士人曰徃人之患衡之邊邑首當之今賴我秦公克承 上命底天之罰實生郴陽人吾與若等咸休其請文史氏紀公勞伐衆皆合辭曰是乃授簡於舒誥舒誥曰余非深於文詞其能述茲盛績雖然周平淮夷作江漢唐平蔡地作皇武皆以備一代之雅今旣不得達之 朝廷庶幾播之聲音傳之湘漢之間觀風者或有采焉作平徃詩

王旅中丞秦公受 命平徃大有功也

王旅暉暉下于南鄙蠢茲徃人實干天紀 帝德如天冒于無極遠夷且綏矧此中國彼嚚弗迪荼毒是欽剝我順民犯我邊塵 帝乃震怒爰 命中丞率厥將士事于徃征

惟中丞公受命孔睿智大心小勝於未戰既望既  
禡旣攻旣同寧執匪敵蹇蹇匪躬爰誓爾衆罔愆而  
度爾不用命于爾有戮凡百御事畏公宿德乃步乃  
齊曷敢有越

塗公煌煌鏤膺碌碌高牙崇崇戟枝簇簇維驥維驎  
超于未濟載旄載纛蔽柳之野武夫桓桓維千之特  
綠彼崖矣如猱斯捷載登載涉于囊于橐瘁其赭尾  
百姓不讞

閑閑而止第第而起罔致而附乃伐而肆彼乃不悛  
持券乘鎗我軍旣臨視如怒螳元惡大憝悉繫長纓  
凡三逾月績用告成率彼之庭增爲郭式匪貪疆土  
去惡務絕

昔公來矣雨雪霏霏心乎棘矣哀我人斯今旣旋矣  
春日載陽振旅闐闐度衡浮湘老幼感泣載于路岐  
今日何日見漢旌旗昔也耕織弗食弗衣今無暴客  
近我藩籬

行矣獻誠于燕之京其覲旣襄 王心載寧 帝曰  
戎功實惟爾謨公拜稽首謙退不居 帝曰惠民實  
惟爾德公拜稽首曰 帝之力亦旣饗止亦旣賚止  
歌彼彤弓覺報宴止

徃人旣平 皇化斯同湘南之南桂東之東虬乃韞  
矣韜乃折矣四夷咸來朝明堂矣允矣惟公勳望顯  
顯天下共覩卿雲在空願言天啓我 皇聖明坐公  
廟堂泰階永平



右王旅七章章十六句

安成劉丙 工部右侍郎

伏以頑弗卽工小醜動重華之念謙能受益良  
臣虞大禹之師慨自昔之難為慶于今之盛事  
功非幸致威豈徒加恭惟

欽差巡撫湖廣地方兼贊理軍務都察院右副都御  
史秦 臺下敏識沉幾英猷絕物肥梳剔抉已  
盡澂澳忍於湖湘劫掠焚肯坐視創殘於柳  
桂犬羊之性方撫而遽離蛇豕之心易動而難  
測殺氣與烟嵐而橫填窮谷蚩尤之毒霧方嘘  
怨聲與呻吟而遠接通都西伯之鈞援曷已哀  
茲鯨寡報虐以威蝮彼苗民無辭于罰況

九重命我以誅討三省視公爲安危蓋方常造命於  
倒懸安得畏舉羸於時詘機發於戶庭之內事  
集於旬月之間調發隨宜用蠻畿如甸服征需  
合度變大侵爲有年苦茲叢翳之深箐加以紛  
拏之積雪乃聚米爲山谷虜已在於目中試投  
醪于江流孰不爲之心醉一鼓而渠魁授首再  
發而群醜就擒百穴皆搜指揮雷電羣豪協贊  
呼吸風雲清我幅幘

廊廟擬白麻之詔靖而仇敵閭閻歌破斧之詩  
夙志固在於

君民英武宜昭於夷夏丙等聞一月而三捷慶四方  
之無虞桂陽之嘉績方成而郴嶺之凱歌隨繼

勳業嗣三苗之分北忠勤比五月而渡瀘帝省  
其山已見

皇風之穆穆載絜我矢猶看子羽之懽懽惠風暢而  
天宇澄輝生草木鼙鼓鳴而江光動喜溢山川  
用陳揚厲之辭少展歡愉之志

一聲傳報邊塵靖春風正吹江漢雪夜輕擒嵐  
烟淨洗真是

廟堂神算湖山重換看矢不多遺馬無頻汗却晒  
前朝伏波動業未能半功名誰是幸也腹藏  
兵甲事業自然輝煥淮蔡裴公北門寇老豈是  
邊方藩翰天心正眷况

朝野輿情倚公楨幹鸚鵡洲前錦衣留暫看

長沙黃寶都御史

恭惟都臺秦老先生大人台座識蘊高明氣涵  
剛大與學兼通於世務嘉猷允合於

帝心果自嶽伯峻秉國憲方其撫綏於三楚豈特澤  
加於萬民人蒙奠枕之安國有長城之固邇者  
苗蠻負險大肆陸梁吞噬居人嗥兇州邑

皇赫斯怒爰命專征進剿有名師興以律不旬月  
間渠魁繫頸餘孽獻俘大捷上聞羣黎按堵  
雖田野鄙夫猶謳歌而志喜矧屬郡下僚可掄  
揚而無詞設成俚語愧無烝民誦山甫之詩敬  
致心香惟有師道爲南豐之意謹疏短引用綴

蕪詞詞曰

峻節清風奉專征，命出掃犁庭。看倚天長劍，胸懷數萬甲。兵螢燭敢與爭衡，吉甫英聲子房籌策。

當代忠良第一人，師出迅於雷霆。瞬息倒戈如崩，凱歌喜動。

嚴宸合擬周之維翰，維屏把炎荒煙瘴。即時收捲，削平山寨，屯守軍營。再榮枯朽，剔除深蠹。箇是人間有脚陽春，益世功。

優詔起入侍。

龍袞麒麟。

右調沁園春。

安楚錄卷七。